

瑜伽師地論卷第四十四

彌勒菩薩說

唐三藏沙門玄奘奉詔譯

本地分中菩薩地

初持瑜伽處供養親近無量品第十六

云何菩薩供養親近修習無量唄陀南曰

供三寶 親善友 修無量 最爲後

云何菩薩於如來所供養如來當知供養略有十種
一設利羅供養。二制多供養。三現前供養。四不現前
供養。五自作供養。六教他供養。七財敬供養。八廣大

供養。九無染供養。十正行供養。

若諸菩薩親現供養如來色身。是名設利羅供養。

若諸菩薩於爲如來所造一切。若窣堵波。若龕。若臺。

若故制多。新制多。所設諸供養。是名制多供養。

若諸菩薩於如來身。或制多所親面對前。現矚現見。

而設供養。是名現前供養。

若諸菩薩於如來所。若制多所。現前施設供養具時。

發起增上意樂。俱心淨信。俱心作是思惟。若一如來。

法性。卽是去來今世一切如來法性。若一如來制多。

法性。卽是十方無邊無際一切世界所有如來制多。

法性。是故我今供現如來。卽是供養其餘三世一切

如來。供現制多。卽是供養其餘十方無邊無際一切

世界。若窣堵波。若龕。若臺。若故制多。若新制多。當知

是名菩薩俱供現不現前一切如來。及以制多。

若諸菩薩於不現前一切如來。及以制多。作如來想。

普爲三世一切如來一切十方如來。制多施設供養。

當知是名菩薩唯供不現前佛。及以制多。若諸菩薩

佛涅槃後。爲如來故。造立形像。若窣堵波。若龕。若臺。

隨力隨能。或一。或二。或復眾多。乃至百千俱胝等數。

如是菩薩於如來所。設不現前弘廣供養。當獲無量

大福德果。攝受無量廣大梵福。菩薩由此能於無量劫大劫中。不墮惡趣。由是因緣。非不圓滿無上正等菩提資糧。

此中菩薩唯供現前佛及制多。應知獲得廣大福果。若唯供養不現前佛及以制多。應知獲得大大福果。若俱供養現不現前佛及制多。應知獲得最大福果。爲無有上。

若諸菩薩於如來所若制多所欲設供養。唯自手作。不使奴婢作使朋友僚庶親屬。不依懈惰諸放逸處。而設供養。是名菩薩自作供養。

若諸菩薩於如來所若制多所欲設供養。非唯自作。亦勸父母妻子奴婢作使朋友僚庶親屬。及他國王王子大臣長者居士。若婆羅門國邑聚落饒財商主。下至一切男女大小貧賤苦厄旃荼羅等。及以親教軌範諸師。其住近住一切弟子。同梵行者。諸出家者。外道等眾。令於如來若制多所。隨力隨能作諸供養。當知是名菩薩自他咸共供養。

若諸菩薩現有少分可供財物。與悲愍心。故思施與貧苦少福無力有情。令於如來若制多所持用供養。願彼當來多受安樂。彼得此物供養如來及以制多。

菩薩於斯自無所供。當知是名菩薩。唯教他設供養。此中菩薩若唯自供佛及制多。應知獲得廣大福果。若唯教他。應知獲得大大福果。若能自他俱共供養。應知獲得最大福果。爲無有上。

若諸菩薩於如來所。若制多所。以諸衣服。飲食臥具。病緣醫藥。供身什物。敬問禮拜。奉迎合掌。種種熏香。末香塗香。華鬘妓樂。幢蓋旛燈。歌頌稱讚。五輪歸命。趨繞右旋。而爲供養。或復奉施無盡財供。或復奉施末尼眞珠。瑠璃螺貝。璧玉珊瑚。碑磔碼碯。琥珀金銀。赤珠右旋。如是等寶。或復奉施末尼環玕。寶璫印等。

諸莊嚴具。乃至奉施種種寶鈴。或散珍奇。或纏寶縷。而爲供養。是名菩薩於如來所。若制多所。財敬供養。若諸菩薩於如來所。若制多所。長時施設。卽上所陳財敬供養。若多供具。若妙供具。若現在前。不現在前。若自造作。教他造作。若消淨心。猛利勝解。現前供養。卽以如是所種善根。迴向無上正等菩提。如是七種。說名菩薩廣大供養。

若諸菩薩於如來所。若制多所。自手供養。不懷輕慢。令他供養。不住放逸懈惰不敬。而爲供養。不輕棄擲。不散漫心。無雜染心。而爲供養。不於信佛國王大臣。

諸貴勝前。爲財敬故。詐設種種虛事供養。不雌黃塗。不酥灌洗。不以種種局崛羅香。遏迦華等。餘不淨物。而爲供養。如是六種。說名菩薩無染供養。

又諸菩薩。如是財敬廣大。無染供養。如來及制多時。或自臂力所集財寶。或從他求所獲財寶。或得眾具自在財寶。能爲如是種種供養。

已得眾具自在菩薩。化作化身。或一或二。或復眾多。乃至百千俱胝等數。此一切身。皆於如來及制多所。恭敬禮拜。復從如是一一化身。化出多手。或百或千。或過是數。此一切手。皆持無量出過諸天上妙華香。

殊勝可愛種種珍寶奉散。如來及制多所。復從如是一切化身。化出無量上妙音聲。歌讚如來廣大甚深。眞實功德。復從如是一切化身。化出無量最上最妙。環玕璩印寶莊嚴具。幢蓋旛燈種種供具。供養如來。及以制多。如是等類。已得眾具自在菩薩所設供養。皆屬自心。如是菩薩。不更希求如來出世。何以故。由此菩薩已得證入不退轉地。一切佛土往來供養。皆無礙故。

又諸菩薩。若無自力所集財寶。亦無從他求得財寶。及無菩薩所獲眾具自在財寶。可設供養。然於所有

或瞻部洲。或四大洲。或千世界。二千世界。或復三千大千世界。乃至十方無邊無際諸世界中。下中上品供養如來一切供具。菩薩於彼。以淨信俱勝解俱心。週徧思惟一切隨喜。如是菩薩少用功力。而興無邊廣大供養。攝受菩提廣大資糧。菩薩於此恆常無間起真善心。起歡喜心。當勤修學。

若諸菩薩少時少時。須臾須臾。乃至下如搆牛乳頃。普於一切蠢動有情。修習慈悲喜捨俱心。於一切行。修無常想。無常苦想。苦無我想。於其涅槃。修勝利想。於佛法僧波羅密多。修習隨念。少時少時。須臾須臾。

於一切法發生少分下劣忍智。信解離言法性真如。起無分別無相心住。何況於此若過若增。如是守護菩薩所受尸羅律儀。於奢摩他毗鉢舍那菩提分法。精勤修學。亦於一切波羅密多。及諸攝事。正勤修學。是名菩薩於如來所正行供養。如是供養爲最第一。最上最勝。最妙無上。如是供養過前所說具一切種財敬供養。百倍千倍。乃至鄔波尼殺曇倍。由此十相應知。是名具一切種供養如來。如供養佛。如是供養若法若僧。隨其所應當知亦爾。如是菩薩於三寶所。由十種相興供養時。應緣如來。

發起六種增上意樂。一者無上大功德田增上意樂。二者無上有大恩德增上意樂。三者一切無足二足及多足等有情中尊增上意樂。四者猶如卽曇妙華極難值遇增上意樂。五者獨一出現三千大千世界增上意樂。六者一切世出世間功德圓滿一切義依法所僧所少分思惟而興供養。尚獲無量大功德果。何況其多。

復次菩薩成就幾相。能爲善友。由幾種相。善友不虛。成就幾相。令善友性作信依處。復有幾種善友菩薩。

於所化生爲善友事。菩薩幾種親近善友。由幾種想。於善友所聽聞正法。由幾種處於善友所聽聞法時。於說法師不作異意。

當知菩薩成就八支。能爲善友。眾相圓滿。一者住戒。於諸菩薩律儀戒中。妙善安住。無缺無穿。二者多聞。覺慧成就。三者具證。得修所成。隨一勝善。逮奢摩他。毗鉢舍那。四者哀愍。內具慈悲。能捨自己。現法樂住。精勤無怠。饒益於他。五者無畏。爲他宣說正法。教時。非由恐怖。忘失念辯。六者堪忍。於他輕笑調弄。鄙言。違拒等事。非愛言語。種種惡行。皆悉能忍。七者無倦。

其力克彊能多思擇處在四眾說正法時言無蹇澀
心不疲厭。八者善辭語具圓滿不壞法性言辭辯了。
若諸菩薩具五種相眾德相應能為善友所作不虛。
一者於他先欲求作利益安樂。二者於彼利益安樂
如實了知無顛倒覺。三者於彼善權方便順儀說法。
隨眾堪受調伏事中有能有力。四者饒益心無厭倦。
五者具足平等大悲於諸有情劣中勝品心無偏黨。
若諸菩薩成就五相令善友性作信依處令他遠聞
極生淨信。何況親覩。一者勝妙威儀圓滿威儀寂靜。
威儀具足。一切支分皆無躁動。二者敦肅。三業現行。

無掉無擾。三者無矯不為誑他故思詐現嚴整威儀。
四者無嫉終不於他說法所得利養恭敬生不堪忍。
而常自勵請他說法復恆勸餘於彼廣施利養恭敬。
無諂偽心。又常於他其心純淨見彼說法及得財敬。
深生隨喜。如自所獲利養恭敬心生歡喜見他所得
利養恭敬其心歡喜復過於是。五者儉約。尠儲器物。
隨得隨捨。

善友菩薩由五種相於所化生為善友事。一能諫舉。
二能令憶。三能教授。四能教誡。五能說法。如是諸句
廣辯應知。如聲聞地教授教誡廣說如前力種性品。

當知菩薩由四種相。方得圓滿親近善友。一於善友有病無病。隨時供侍。恆常發起愛敬淨信。二於善友隨時敬問。禮拜奉迎。合掌殷勤。修和敬業。而爲供養。三於善友如法衣服。飲食臥具。病緣醫藥。資身什物。隨時供養。四於善友若正依止。於如法義。若合若離。隨自在轉。無有傾動。如實顯發。作奉教心。隨時往詣。恭敬承事。請問聽受。

若諸菩薩欲聽法時。作五種想。應從善友聽聞正法。一作寶想。難得義故。二作眼想。能得廣大俱生妙慧。因性義故。三作明想。已得廣大俱生慧眼。於一切種

如實所知等照義故。四作大果勝功德想。能得涅槃。及三菩提無上妙迹。因性義故。五作無罪大適悅想。於現法中未得涅槃。及三菩提。於法如實揀擇止觀。無罪大樂。因性義故。

若諸菩薩欲從善友聽聞法時。於說法師。由五種處。不作異意。以純淨心。屬耳聽法。一於壞戒。不作異意。謂不作心。此是破戒。不住律儀。我今不應從彼聽法。二於壞族。不作異意。謂不作心。此是卑姓。我今不應從彼聽法。三於壞色。不作異意。謂不作心。此是醜陋。我今不應從彼聽法。四於壞文。不作異意。謂不作心。

此於言辭不善藻飾。我今不應從彼聽法。但依於義。不應依文。五於壞美不作異意。謂不作心。此語麤惡。多懷忿恚。不以美言宣說諸法。我今不應從彼聽法。如是菩薩欲聽法時。於是五處不應作意。但應恭敬。攝受正法。於說法師未嘗見過。若有菩薩其慧微劣。於說法師心生嫌鄙。不欲從其聽聞正法。當知此行不求自利。退失勝慧。

云何菩薩修四無量慈悲喜捨。謂諸菩薩略有三種修四無量。一者有情緣無量。二者法緣無量。三者無緣無量。若諸菩薩於其三聚一切有情安立以爲無

苦無樂有苦有樂。於其最初欲求樂者。發起與樂增上意樂。普緣十方安住無倒有情勝解。修慈俱心。當知是名有情緣慈。若諸菩薩住唯法想增上意樂。正觀唯法假說有情。修慈俱心。當知卽此名法緣慈。若諸菩薩復於諸法遠離分別。修慈俱心。當知卽此名無緣慈。如有情緣法緣無緣三慈差別。悲喜捨三當知亦爾。

若諸菩薩於有苦者發起除苦增上意樂。普於十方修悲俱心。是名爲悲。若諸菩薩於有樂者發起隨喜增上意樂。普緣十方修喜俱心。是名爲喜。若諸菩薩

卽於如是無苦無樂有苦有樂三種有情隨其次第發起遠離癡瞋貪惑增上意樂。普緣十方修捨俱心。是名爲捨。

此中菩薩慈等無量有情緣者當知其相與外道共。若法緣者當知其相與諸聲聞及獨覺共。不共外道。若無緣者當知其相不共一切聲聞獨覺及諸外道。又諸菩薩三種無量應知安樂意樂所攝謂慈悲喜。一種無量應知利益意樂所攝是謂爲捨。如是菩薩一切無量名爲哀愍。以諸菩薩成就此故名哀愍者。此中菩薩於有情界觀見一百一十種苦。於諸有情

修悲無量。何等名爲百一十苦。

謂有一苦。依無差別流轉之苦。一切有情無不皆墮流轉苦故。復有二苦。一欲爲根本苦。謂可愛事若變若壞所生之苦。二癡異熟生苦。謂若猛利體受所觸。卽於自體執我我所。愚癡迷悶生極怨嗟。由是因緣。受二箭受。謂身箭受及心箭受。復有三苦。一苦苦。二行苦。三壞苦。復有四苦。一別離苦。謂愛別離所生之苦。二斷壞苦。謂由棄捨眾同分死所生之苦。三相續苦。謂從此後數數死生展轉相續所生之苦。四畢竟苦。謂定無有般涅槃法諸有情類五取蘊苦。復有五

苦。一貪欲纏緣苦。二瞋恚纏緣苦。三昏沈睡眠纏緣苦。四掉舉惡作纏緣苦。五疑纏緣苦。復有六苦。一因苦。習惡趣因故。二果苦。生諸惡趣故。三求財位苦。四勤守護苦。五無厭足苦。六變壞苦。如是六種總說爲苦。復有七苦。一生苦。二老苦。三病苦。四死苦。五怨憎會苦。六愛別離苦。七雖復希求而不得苦。復有八苦。一寒苦。二熱苦。三饑苦。四渴苦。五不自在苦。六自逼惱苦。謂無繫等諸外道類。七他逼惱苦。謂遭遇他手塊等觸蚊蚋等觸。八一類威儀多時住苦。復有九苦。一自衰損苦。二他衰損苦。三親屬衰損苦。四財位衰

損苦。五無病衰損苦。六戒衰損苦。七見衰損苦。八現法苦。九後法苦。復有十苦。一諸食資具匱乏苦。二諸飲資具匱乏苦。三騎乘資具匱乏苦。四衣服資具匱乏苦。五莊嚴資具匱乏苦。六器物資具匱乏苦。七香鬘塗飾資具匱乏苦。八歌舞妓樂資具匱乏苦。九照明資具匱乏苦。十男女給侍資具匱乏苦。

當知復有餘九種苦。一一切苦。二廣大苦。三一切門苦。四邪行苦。五流轉苦。六不隨欲苦。七違害苦。八隨逐苦。九一切種苦。一切苦中復有二苦。一宿因所生苦。二現緣所生苦。廣大苦中復有四苦。一長時苦。二

猛利苦。三雜類苦。四無間苦。一切門苦中亦有四苦。一那落迦苦。二傍生苦。三鬼世界苦。四善趣所攝苦。邪行苦中復有五苦。一於現法中犯觸於他。他不饒益所發起苦。二受用種種不平無食界不平等所發起苦。三卽由現法苦所逼切。自然造作所發起苦。四由多安住非理作意所受煩惱隨煩惱纏所起諸苦。五由多發起諸身語意種種惡行所受當來諸惡趣苦。流轉苦中復有六種輪轉生死不定生苦。一自身不定。二父母不定。三妻子不定。四奴婢僕使不定。五朋友宰官親屬不定。六財位不定。自身不定者謂先

爲主後爲僕隸。父母等不定者謂先爲父母乃至親屬。後時輪轉反作怨害及惡知識。財位不定者謂先大富貴。後極貧賤。不隨欲苦中復有七苦。一欲求長壽不隨所欲。生短壽苦。二欲求端正不隨所欲。生醜陋苦。三欲生上族不隨所欲。生下族苦。四欲求大富不隨所欲。生貧窮苦。五欲求大力不隨所欲。生羸劣苦。六欲求了知所知境界不隨所欲。愚癡無智現行生苦。七欲求勝他不隨所欲。反爲他勝而生大苦。違害苦中復有八苦。一諸在家者妻子等事損減生苦。二諸出家者貪等煩惱增益生苦。三饑餓逼惱之所

生苦。四怨敵逼惱之所生苦。五曠野險難迫迕逼惱之所生苦。六繫屬於他之所生苦。七支節不具損惱生苦。八殺縛所截捶打驅擯逼惱生苦。隨逐苦中復有九苦。依世八法有八種苦。一壞法壞時苦。二盡法盡時苦。三老法老時苦。四病法病時苦。五死法死時苦。六無利苦。七無譽苦。八有譏苦。是名八苦。九希求苦。如是總說名隨逐苦。一切種苦中復有十苦。謂如前說五樂所治有五種苦。一因苦。二受苦。三唯無樂苦。四受不斷苦。五出離遠離寂靜菩提樂所對治家欲界結尋異生苦。是名五苦。復有五苦。一逼迫苦。二

眾具匱乏苦。三界不平等苦。四所愛變壞苦。五三界煩惱品麤重苦。是名五苦。前五此五總十種苦。當知是名一切種苦。

前五十五。今五十五總有一百一十種苦。是菩薩悲所緣境界。緣此境故。諸菩薩悲生起增長。修習圓滿。又諸菩薩於大苦蘊緣十九苦發起大悲。何等名爲十九種苦。一愚癡異熟苦。二行苦所攝苦。三畢竟苦。四因苦。五生苦。六自作逼惱苦。七戒衰損苦。八見衰損苦。九宿因苦。十廣大苦。十一那洛迦苦。十二善趣所攝苦。十三一切邪行所生苦。十四一切流轉苦。十

五無智苦。十六增長苦。十七隨逐苦。十八受苦。十九
麤重苦。

由四緣故。悲名大悲。一緣甚深微細難了。諸有情苦
爲境生故。二於長時積習成故。謂諸菩薩經於無量
百千大劫積習所成。三於所緣猛利作意而發起故。
謂諸菩薩由是作意悲所執持。爲息有情眾苦因緣。
尙能棄捨百千身命。况一身命及以資財。於一切種
治罰大苦。爲諸有情悉能堪忍。四極清淨故。謂諸菩
薩已到究竟菩薩清淨。若諸如來已到佛地。如來清
淨。

1902

又諸菩薩由前所說百一十苦。於諸有情修悲心時。
則爲修習一切菩薩所有悲心。復能速證悲意樂淨。
證入菩薩淨意樂地。於諸有情獲得菩薩極親厚心。
極愛念心。欲作恩心。無厭倦心。代受苦心。調柔自在。
有堪能心。諸聖聲聞已得證入苦諦現觀。已到究竟
於苦深遠厭俱行心相續而轉。不如菩薩於諸有情
悲前行心。正觀墮在百一十種極大苦蘊。菩薩如是
以所修悲熏修心故。於內外事無有少分而不能捨。
無戒律儀而不能學。無他怨害而不能忍。無有精進
而不能起。無有靜慮而不能證。無有妙慧而不能入。

1903

是故如來若有請問菩薩菩提誰所建立。皆正答言。菩薩菩提悲所建立。如前所說。一一無量。皆有無量。菩薩如意圓德隨轉。皆能攝受無量愛果。皆無量種。一向妙善無罪隨轉。當知菩薩精勤修習。如是無量。能得四種功德勝利。謂由修習此無量故。先得最勝現法樂住。攝受增長無量最勝福德資糧。能於無上正等菩提意樂堅固。爲欲饒益諸有情故。於生死中。堪能忍受一切大苦。

本地分中菩薩地

初持瑜伽處菩提分品第十七之一

1904

云何菩薩菩提分法。塢柁南曰。

慚愧堅力持。無厭論世智。正依無礙解。

資糧菩提分。止觀性巧便。陀羅尼正願。

三摩地有三。法塢柁南四。

云何名爲菩薩慚愧。當知慚愧略有二種。一者自性。二者依處。言自性者。謂諸菩薩於罪現行。能正覺知。我爲非法。內生羞恥。是名爲慚。卽於其中。能正覺知。於他敬畏。外生羞恥。是名爲愧。菩薩羞恥本性。猛利。况復修習。如是應知名爲菩薩慚愧自性。言依處者。略有四種。若諸菩薩於所應作。不隨建立。而生羞恥。

1905

當知是名第一依處。若諸菩薩於不應作隨順建立而生羞恥。當知是名第二依處。若諸菩薩於覆已惡而生羞恥。當知是名第三依處。若諸菩薩於自所生惡作有依。隨逐不捨而生羞恥。當知是名第四依處。如是應知名爲菩薩慚愧依處。

云何菩薩堅力持性。當知此性略有二種。一者自性。二者依處。言自性者。謂能禁制染汙心性。不隨煩惱自在行性。堪忍苦性。種種眾多猛利怖畏。雖現在前。而正加行無傾動性。性勇相應能正思擇。是故得成堅力持性。如是名爲堅力持性。自性如是菩薩堅力

持性。略說應知有五依處。一者會遇生死輪轉種種大苦所化有情種種邪行。二者爲益諸有情故。誓受長時生死流轉。三者遭遇異論朋黨諍競難詰。及處大眾宣揚法義。四者誓受一切菩薩所應學處。五者聽聞廣大甚深難思議法。是名堅力持性依處。

云何菩薩心無厭倦。當知菩薩由五因緣普於一切正加行中心無厭倦。一者菩薩性自有力。故無厭倦。二者菩薩卽於如是無厭倦心。數數串習。故無厭倦。三者菩薩方便攝受精進勇猛。能正隨觀前後所得展轉殊勝。故無厭倦。四者菩薩成就猛利增上妙慧

正思擇力。故無厭倦。五者菩薩於諸有情。猛利悲心。極哀愍心。恆常現前。故無厭倦。

云何菩薩善知諸論。謂諸菩薩於五明處。名句文身。相應諸法。從他善受。言善通利。卽於如是諸法妙義。或從他所善聽善決。或自專精善擇善思。如是知法。知義菩薩。於法於義。爲不忘失。恆常精勤不捨加行。又爲了知所餘新新後後法義殊勝差別。雖復聞思。已到究竟。而由此故。漸次成熟。於此法義獲得淨信。由是行相當知菩薩。知諸論智。無量圓滿。無有顛倒。云何菩薩善知世間。謂諸菩薩普於一切有情世間。

1908

如實了知。如是世間。極爲艱險。甚爲愚闇。所謂雖有生老及死。數數死生。而諸有情於老死等。上升出離。不如實知。又諸菩薩如實了知有情世間。有諸穢濁。濁世增時。無諸穢濁。濁世減時。謂依五濁。一者壽濁。二者有情濁。三者煩惱濁。四者見濁。五者劫濁。如於今時。人壽短促。極長壽者。不過百年。昔時不爾。是名壽濁。如於今時。有情多分。不識父母。不識沙門。若婆羅門。不識家長。可尊敬者。作義利者。作所作者。於今世罪及後世罪。不見怖畏。不修惠施。不作福業。不受齋法。不受淨戒。昔時不爾。是名有情濁。如於今時。有

1909

情多分習非法貪。不平等貪。執持刀劍執持器仗。鬪訟諍競。多行諂誑詐僞妄語。攝受邪法。有無量種惡不善法。現可了知。昔時不爾。是名煩惱濁。如於今時。有情多分爲壞正法爲滅正法。造立眾多像似正法。虛妄推求邪法邪義以爲先故。昔時不爾。是名見濁。如於今時。漸次趣入饑饉中劫。現有眾多饑饉可得。漸次趣入疫病中劫。現有眾多疫病可得。漸次趣入刀兵中劫。現有眾多互相殘害刀兵可得。昔時不爾。是名劫濁。是名菩薩如實了知有情世間。又諸菩薩如實了知諸器世間破壞成立。如器世間破壞成立。

差別而知。又諸菩薩於其世間。於世間集於世間滅。於能往趣世間集行。於能往趣世間滅行。於其世間愛味過患。及與出離。皆如實知。又諸菩薩如實了知。眼乃至意諸無色蘊。四大造色。成士夫身。唯有爾所假名人性。於中所有想。或我。或有情。此唯有想。於中所有自號言說。我眼見色。廣說乃至我意知法。此亦唯有自號言說。於中所有世俗語言。謂此長老有如是名。如是種類。如是族姓。如是飲食。如是領納若苦若樂。如是長壽。如是久住。如是盡其壽量邊際。此亦唯有世俗言說。菩薩於此皆如實知。由諸菩薩如實

了知有情世間流轉差別。若器世間流轉差別。若八種相觀世間義。若諸世間所有勝義。是故說名善知世間。

復次菩薩若見年德俱尊勝者。能正奉迎。敷座延坐。敬問禮拜。合掌殷勤。修和敬業。若見年德俱相似者。能正問訊。酬對歡慰。以輒美言。共興談論。不依等慢。而自格量。若見年德俱卑劣者。隨力隨能。勸修勝德。顯實少德。覆實多過。終不舉發。令其恥愧。亦不輕陵。令心退沒。知有希求。若財若法。終不背面。亦不顰蹙。不譏悞失。不憊退榮。於是一切劣等勝品。諸有情類。

1912

若見彼時。先意慰問。讚言善來。無倒安處。能正隨力。攝以財法。雖處尊勝。而於有情。終不乖戾。不自珍奇。亦不憍傲。所攝有情。縱懷資給。有病無病。終不棄捐。身業語業。無不隨順。若識不識。一切等心。爲友爲朋。無怨無隙。於無依怙。一切有情。隨力隨能。作依作怙。不託異門。發他憂苦。令彼須臾。住不安樂。若有因緣。須現談謔。稱理而爲。非不稱理。雖遇情交。極相親密。年事斯等。無乖隔者。亦不共談。匪仁言論。終不於他。久懷忿恨。設復暫起。不斥其諱。若復爲他。身語訾辱。或善思擇。或依正法。或省已過。而自開解。不譴於他。

1913

其心安靜而不輕躁。身語意業起必審詳。普能遠離十四垢業。藏隱六方。遠四惡友。攝四善友。如是一切應知。具如尸佉。絡迦契經中說。或為現法利益事。義財位相應。起策具足。守護具足。平等養命。於諸世間。工巧業處。皆得善巧。無詔無幻。性不誑他。於罪現行。深懷慚恥。正行具足。尊重正行。守護正行。有所寄付。深可倚信。於他財物。無所規度。舉貸他物。終不違捍。分所共財。平等無矯。共知真寶。賣者不識。稱寶酬價。無枉毫釐。於世時務。令儀軌範。為益世間。辯正機捷。於所應作。彼彼事中。他正來求。皆為助伴。敦質無動。

不託餘緣。善營事業。非為不善。若為帝王。以法治世。不以非法。不好責罰。若御大眾。勸捨惡戒。令修善戒。成就八種賢聖語言。謂於所見。問答言見。於聞。覺知。問答言知。於所不見。問答不見。於所不聞。不覺不知。問答不知。菩薩成就如是等法。如其世間正所應知。如其世間正所應轉。於彼一切。皆如實知。是故名為善知世間。

瑜伽師地論卷第四十四

音釋

設利羅

此云靈骨制多。慧琳音義第一古譯云制多。底即寺字。伽藍塔廟等是。

也。據玉螺貝屬蚌。